

# Powšitkowne WOZJEWJENJA

njedźelu, 17. februara 2019

## Počesćenje Michała Hórnik

Na počesćenje kanonika Michała Hórnik składnostnje jeho 125. posmjertnin su wšitcy pjatk, 22. februara, w 15 hodź. na Budyski Mikławšk k jeho rowej přeprašeni. Zarjadowar je Towarstwo Cyrila a Metoda (TCM), kotrehož iniciator wón bě. Dalše spominanje na njeho přewjedže TCM štwórtk, 7. měrca, wječor we Worklečanskej kapałce zhromadnje z Towarstwom kapałki Marije maćerje Božeje, a župu „Michał Hórnik“ a pjatk, 8. měrca, dopołodnja ze Serbskej wyšej šulu „Michał Hórnik“ w jeje domje.

## Hižo nětkole za pasionske hry klětu w Oberammergauwje so přizjewić

Na předstajenje pasiona w Oberammergauwje přeprašuje Towarstwo Cyrila a Metoda z.t. (TCM) wěriwych z katolskich serbskich wosadow sobotu, 3. oktobra 2020. Wjetšinu zastupnych lisćikow su hižo rozpředali. TCM je tam 50 městnow rezerwowało, dyrbi pak je hižo nětkole zapłaćić. Bus wotjědže dzeń do předstajenja z Łužicy a so dzeń po nim wróći. Zajimcy měli so hač do pjatka, 22. měrca, w redakciji Katolskeho Posoła, telefonowe číslo (0 35 91) 55 02 10, přizjewić a hač do srjedy, 27. měrca, 200 eurow na konto towarstwa pola banki LIGA přepokazać: Cyrill-Methodius-Verein e.V., IBAN: DE 56 750 90 300 000 828 23 66. Bliše informacije dóstanu zajimcy, hdyž so přizjewja.

## Zhromadny dzeń za 1. a 2. lětnik

Dekanatne dušepastyrstwo džěci přeprašuje šulerjow 1. a 2. lětnika pod hesłom „Pój, wjesel so!“ na zhromadny dzeń, kotryž wotměje so srjedu, 27. februara, wot 9.00 do 15.00 hodź. we Worklečanskim Don Boskowym domje. Zajimcy njech so prošu hač do wutory, 19. februara, pod telefonowym čisłom (03 57 96) 8 87 07 abo přez mailku na worklecy-kise@gmx.de we Worklecach přizjewja. Rjenje by było, bychu-li wšitcy w póstniskim kostimje přišli. Za wudawki dnja zběra so wot kóždneho wobdźělnika přinošk, kotryž wučinja štyri eura.

## Seminary k přihotej na mandželstwo

Přizjewjenja za lětuše seminary k přihotej na sakrament mandželstwa pjatk a sobotu, 8. a 9. kaž tež 22. a 23. měrca, přijimuju pisomnje hač do srjedy, 20. februara, w Dekanatnym dušepastyrstwje we Worklecach. Formulary k tomu su w cyrkwjach wupoložene. Dalši seminar wotměje so pjatk a sobotu, 29. a 30. nowembra.

## Wšědny dzeń w klóštrje dožiwić

Cistercienski klóštra Marijineje hwězdy w Pančicach-Kukowje přeprašuja lětsa wjackróc na dny za młode žony, kotrež pytaja za duchownym powołanjom w rjadniskim žiwjenju. Jim skići so składnosć, wšědny dzeń w klóštrje kónc tydženja dožiwić. Tajkele dny poskićeja wot pjatka do njedźele, 1. do 3. měrca, 28. do 30. junija, 6. do 8. septembra a 13. do 15. decembra. Přizjewić měli so zajimče pola abatisy Gabriele Hesse, e-mailowa adresa aebtissin@marienstern.de abo z póstom na adresu Cistercienska abtownja Marijina hwězda, Čišinskeho 35, 01920 Pančicy-Kukow.

## **„Mjenje stresa – wjace wjesela“**

W Domje biskopa Bena w Smochćicach ma so w druhim tydženju lětnich prózdnin wot póndžele do soboty, 13. do 20. julija, swójbny tydzeń pod temu „Mjenje stresa – wjace wjesela“ wotměć. Staršim z dźěćimi wot třoch lět poskićuja tam móžnosć, we wšelakorych seminarach nastorki za wšědny dzeń w swójbje dóstać. Při tym póndže wo respektny kubłanski stil, wo wid na potrěbnosće dźěći a młodostnych kaž tež wo to, na kotre wašnje móža starši na mylace zadžerženske wašnja wotpowědnje reagować. W času seminarow za staršich změja dźěći swójsku zaběru. Kubłanske dny wobsahuja tohorunja pisany wólnočasny program. Nadrobne informacije dóstanu zajimcy w Smochćicach pod telefonowym čislom (03 59 35) 2 23 17.

## **Putniska jězba do Ukrainy**

Putniska jězba do ukrainskeho Lwiva (pólsce Lwów, němsce Lemberg) wotměje so wot štwórtka do wutory, 8. do 13. awgusta, ze Šmitec jězbami w Radworju. Hłowne město zapadneje Ukrainy je ze swojimi stawiznami a kulturu wulce zajimawe. Wšako je w běhu swojich stawiznow přežiwilo pólske, rakuske, sowjetske a němske knjejstwo. Wobdžělimy so na přikład na Božej mši po grjekske-katolskim wobrdžedze a wobhladamy sej katolsku uniwersitu. Dokładny program móža sej zajimcy pod [www.posol.de](http://www.posol.de) wobhladać. Přizjewjenja su móžne pola Šmitec wozydłownistwa w Radworju, telefonowe čisło (03 59 35) 28 60.

*T. Kubašec*